

Spitgar aunc 30 dis e recaltgar 30 milliuns francs

L'Energia Alpina ha survegniu la lubientscha da baghegiar per l'ovra da fotovoltaica SedrunSolar el territori da Scharinas e Cuolm Val en Val Tujetsch. Il medem mument ha igl Inspectorat federal per current ferm dau la lubientscha per las lingias da colligaziun e las staziuns da transformatur. Ils proxims meins duei la finanziaziun da quei implont che cuosta rodund 80 milliuns francs vegnir reglada, silsunter san las lavurs da baghegiar entscheiver.

HANS HUONDER/FMR

Rodund in miez onn suenter che l'Energia Alpina ha inoltrau la damonda da baghegiar pigl implont da fotovoltaica SedrunSolar ei la lubientscha persunter sin meisa. Sco quei che l'interpresa scriva en ina communicaziun als mieds da massa, ha la regenza grischuna dau la lubientscha da baghegiar per l'ovra da fotovoltaica alpina el territori da Scharinas e Cuolm Val che sesanfla buca lunsch naven dil territori da skis da Sedrun. Arrivada ei medemamein la lubientscha digl Inspectorat federal per current ferm per las lingias da colligaziun e las staziuns da transformatur.

Spitgar aunc 30 dis

Aschia ein las premissas dadas per saver realisar il project da fotovoltaica SedrunSolar e da saver colligiar el immediatamein cullas lingias da transport dil current necessarias. Tuttina ha ei ussa aunc num spitgar ils 30 dis che lubeschan da far recuors. «Damai che nus havein scaffiu nies project el rom d'ina procedura da cooperaziun per las organisaziuns interessadas vid igl implont, quintein nus buca cun recuors», di Claudio Deplazes, president dil cussegl d'administraziun dall'Energia Alpina. Las discussiuns cullas organisaziuns per la protecziun digl ambient seigien stadas trasatras constructivas: «Tuttina stuein nus spitgar ussa quels 30 dis, pér lu ha la lubientscha vigur legala.» Per l'Energia Alpina ei la lubientscha da baghegiar per quell'ovra in tierm historic. «Igl ei in project innovativ pigl avegnir», puntuescha Claudio Deplazes.

Ina gronda sfida

«Pil team da project e per las instanzas d'approbaziun dil cantun Grischun e dalla Confederaziun involvi ellas lubientschas, ei quei process staus ina premiera. Ina lubientscha da baghegiar cumparegliabla haveva ei buca dau entochen ussa en quella fuorma», scriva l'Energia Alpina en ina communicaziun als mieds da massa. Differentas damondas han stuiu vegnir sclaridas e quei ha pretendiu dabia discuors denter plirs uffecis cantunals e federals. Quella fasa ha l'Energia Alpina nezegiau per cuntinuar cullas lavurs da planisaziun. Denter auter ei quei era stau il cass per tuccont la finanziaziun digl implont che duei



Ils responsabels pil project SedrunSolar selegran dalla lubientscha da baghegiar obtenida dalla regenza grischuna. Da seniester il president communal Martin Cavegn, il president dil cussegl d'administraziun dall'Energia alpina Claudio Deplazes, il meinafatschenta dall'Energia alpina Ciril Deplazes ed il menader dalla partiziun d'energia regenerabla dall'Energia Alpina, Martin Cavegn. FOTO MAD

producir igl avegnir energia electrica per 6500 casadas sin ina surfatscha da 320 hectaras. «Nus calculein cun cuosts totals da 80 entochen 85 milliuns francs. El rom dil SolarExpress savein nus quintar che la Confederaziun cuvieri 60% da quels cuosts. Davart igl Uffeci federal d'energia havein nus survegniu signals che quei duessi esser pusseivel. Aschia ha ei ussa num recaltgar rodund 30 milliuns francs per segirar il project. En damonda per cuvierer quella part finanziaria vegnan investurs e cun plirs dad els essan nus en discussiuns concretas. Quei ein denter auter era ovras d'electricitad che san surprender e vender ina gronda part dall'energia», di Claudio Deplazes e puntuescha: «En sesez ston duas cumponentas constar pil project SedrunSolar: L'empresa havein nus contonschiu ussa culla lubientscha da baghegiar e la secunda ei igl aspect dalla rentabilitad.» Suenter in'evaluaziun definitiva dils cuosts, respectivamein dalla finanziaziun dil project, vegnan il cussegl d'administraziun dall'Energia Alpina e la suprastanza communal da Tu-

jetsch allura a decider definitivamein pertuccont la realisaziun dil project. L'ovra duei vegnir purtada d'ina nova societad acziunara cul num SedrunSolar.

Entschatta aunc uonn

Las lavurs da construcziun ein gia vegnidas publicadas e proximamein sa il team da projectaziun co las offertas vesan ora. La finamira ei da saver entscheiver cullas lavurs tonpli spert e da saver montar ulteriurs panels gia uonn. Em-prens panels ein gia installai e surveschan dadas denter auter davart l'irradiaziun dil sulegl el liug. «Nus essan dil meini ch'ei seigi realistic d'entscheiver cullas lavurs da baghegiar questa stad ni sil pli tard igl atun», di Claudio Deplazes. Pertuccont igl andament digl entir project lauda el la lavur dil pign team da projectaziun, mo era la prontadad ed igl interess dalla populaziun da Tujetsch da realisar quei project: «La fin finala ei l'entira surfatscha digl implont sin terren communal.»